

Friûl di Jevât

PAR CURE DÂ LA SOCIETÂT FILOLOGJICHE FURLANE

Vie Ascoli, 1, Guriza - tel./fax 0481533849 - gorizia@filologicafriulana.it - www.filologicafriulana.it

Gianluca Franco, di Capriva, vincidôr pe seconde volte dal Premi San Simon di Codroip

Lis premiazioms dal plui grant premi leterari in lenghe furlane, il San Simon di Codroip, rivât ae edizion numar 41, a à sierât la VII edizion de "Setemane de culture furlane". La cerimonie, che si fasile par tradizion in sale consiliâr a Codroip te di di San Simon, 28 di Otubar, no à podût tignîsi in presince par vie des disposizioms ministeriâls vignudis fûr ae fin dal mê e cussì e je stade ospitade inte sede de Filologjiche a Udin e e je lade in direte streaming sul sît setemane.it.

L'incuintri al è stât viert dal president de Societât Filologjiche Federico Vicario, dal Sindic di Codroip Fabio Marchetti e dal president de Arlef Eros Cisilino. Alberto Soramel, de compagnie teatrâl Agnul di Spere, al à dât leture di cualchi toc des oparis vincidoris. Pe sezion dal romanç al à fevelât a non de jurie il president Walter Tomada: "O vin vût une vore ce fâ - al à dit - a sielzi i vincidôrs jenfri i siet lavôrs che a son rivâts, dutis voris di grande cualitât e duncje une vore lontan de situazion capitade cualchi an indaûr quant che il premi nol è stât assegnât". Al è stât segnalât il romanç "Il câs dal Amlêt furlan" di Graziano Urli, che al



"Balade pai dîs di ploie", une riflessione su la vite e il destino

cjape in esam la vicende dal personaç di Shakespeare metintle in relazion cul Friûl. Al è stât invezeit proclamât vincidôr il romanç "See the Sky about to rain. Balade pai dîs di ploie" di Gianluca Franco, une riflessione vivide e inmagante su la vite e il destino, che tantis voltis al somee za scrit ma invezeit al cjape direzioms che i oms no rivin nancje di lontan a suspjetâ. Te motivazion de jurie si lei: "La scriture no je dome une vore controlade ma

ancje curade in ducj i particolârs, no par chel e risulde artificiose ma e ven puartade indevant une vore ben cun naturele e spontaneitât. Al è un lavôr che par vie de strutture a mosaic al letôr i domande di impegnâsi ma cence pratindi l'impossibil. Sul cont de lenghe al olse ma in mût inteligjent: lis peraulis dal savôr plui leterari o mancun dopradis te lenghe di ogni di a son inseridis in contescj che a permetin di capilîs cence

enigmatiche che al lasse sturnîts". Il premi San Simon al previodeve chest an ancje la sezion dai fumuts li che al à vinçût il lavôr "Fidri e Giacinto. Aventure spaziâl" di Emilio Bertossi. Segnalâts, invezeit, "La stravagante maniere cjetade fûr a Udin par risolvî il probleme des epidemii" di Giovanni Di Qual e "Une conte di Erdam. Pirulis di antivirâl" cun tescj di Laura e Chiara Longhino e disens di Sara Zoia.

fastidis. [...] Sul plan dai contignûts al è un scrit di umanitât profonde che nol lasse nuie al sentimentalism o ae retoriche".

No je la prime volte che Gianluca Franco, nassût a Guriza e di simpri a stâ a Capriva, al vinç il San Simon. Al jere za sucedût tal 2018 cul romanç "Silvie te catedrâl di Taragone", ambientât tai lûcs e tai agns dal atentât di Petean. Cumò il public dai letôrs furlans al podarà giudicâ ancje cheste gnove vore, pene publicade de Societât Filologjiche Furlane e - par doprâ ancjemò lis peraulis de jurie - "une vicende che e strissine il letôr de prime ae ultime pagine, cu la fuarce di une tratazion psicologjiche dai personaçs une vore profonde e un finâl



Si è sierade cuntun belanç une vore positif la "Setemane de culture furlane" inmaneade de Societât Filologjiche, che dai 18 ai 28 di Otubar e je rivade a proponi ancje in chest moment cussì dificil un program vivarôs cun plui di sessante events. Tancj di chei, pe prime volte, si son fats in streaming, cussì di rivâ a tancj furlans sparnicjâts ator pal mont ancje in graciis de colaborazion cun Ente Friuli nel Mondo.

La plui grande gnove di cheste VII edizion, ch'ò varessin vût di fâle come par tradizion tal mê di Mai ma o vin tornât a metile in program par Otubar, e je stade di fat la pussibilitât di seguî in direte streaming

In curt tancj events si podaran tornâ a viodi in linie

Sucès pe Setemane de culture furlane 2020

tancj events dal sît de manifestazion www.setemane.it. Une sielte ch'è je stade pardabon decisive stant che, daûr dai decretis ministeriâi dâts fûr in Otubar, o vin podût recuperâ in linie cualchi event che no varessin podût fâ in presince di public. In curt, simpri sul sît de Setemane, a vignaran cjamâts ducj i interventis mandâts in linie, cussì che ducj a puedin tornâ a viodi i contignûts che ur interessin di plui.

Tra i events o nomenin in particolar il ricuart dal professôr Gianfranco D'Aronco a un an de muart, cu la presentazion de sô "Autobiografia degli scritti (1941-2019)" publicade inte golaine "Biblioteca degli studi linguistici e filologici". Ancje la tradizional Fraie, la fieste sociâl che chest an no je stade "de Vierte" ma "de Sierade" e ch'è varès vût di tignîsi a Vit domenie ai 25 di Otubar, le vin fate invezeit in linie. Cussì ancje la cerimonie di premiazion de 41me edizion dal Premi San Simon, che o vin dit parsore.

Tra i events che a àn vût plui sucès o nomenin i ricuarts di Enzo Bearzot a dîs agns de muart, cun ospits preseâts tant che Bruno Pizzul, Franco Causio e Dino Zoff, dal scritôr Riedo Puppo tai cents agns de nassite, cul coordinament di Federico Rossi, de studiosie di tradizioms populârs Andreina Nicoloso Ciceri tai 20 agns de muart, cun Cristina Noacco e Gian Paolo Gri.

Tra i spetacui, simpri in linie, o ricuardin il concerti de Schola Aquileiensis "I vespri per i santi patroni Ermacora e Fortunato" e la leture "1420. Fine di un mondo" su la fin dal Patriarcjât di Aquilee, cun tescj di Giorgio Amodeo e Flavio Vidoni metude in sene de compagnie teatrâl "Gianfranco Saletta" e prodote dal Collettivo Terzo Teatro di Guriza. Tal Gurizan e à vût une vore di sucès a Romans dal Lusinc la rievocazion storiche langobarde "Romans langobardorum" e a Guriza citât o vin vût une bieleschirie di visitis vuidadis multimediâls ae scuvierde di "Gorizia nascosta" cul CTA - Centro Teatro Animazione e Figure e la jentrade ufiçial in Cjasa Ascoli de Union dai Grups folcloristics dal Friûl Vignesie Julie (inte foto). Simpri in Cjasa Ascoli, li che la Filologjiche e à sede dal an passât, al è ancje rivât il bust in zes di Graziadio Isaia Ascoli - che li al nassè e che la Filologjiche i è intitulade - donât de Biblioteche Statâl Isontine.

Un ringraziament particolar ur va ai tancj ents, associazions e istitûts culturâi dal nestri teritori che, pûr cu lis dificoltàs leidis a chest moment di emergjence sanitarie, a àn partecipât cun entusiasim ae "Setemane" e nus àn judât ancje chest an a meti adun une propueste culturâl siore e vivarose.